

PEMBERITAHUAN PERTANYAAN LISAN
MESYUARAT PERTAMA, PENGGAL KETIGA, PARLIMEN YANG KE-13
DEWAN RAKYAT

PERTANYAAN : **LISAN**
DARIPADA : **DR. MOHD HATTA BIN MD RAMLI [KUALA KRAI]**
TARIKH : **25 MAC 2015 (RABU)**
NO. SOALAN : **43**

Minta **Perdana Menteri** menyatakan program yang dibuat untuk mengatasi jurang polarisasi kaum di Malaysia selepas Pilihan Raya Umum Ke-13 dan berapakah jumlah peruntukan yang diberikan.

JAWAPAN:

Tan Sri Yang Di-Pertua,

Isu polarisasi kaum bukanlah sesuatu yang baru. Kita sering dimomok dengan kaum masing-masing yang hanya bergaul, berinteraksi dan berkumpul sesama kaum mereka sahaja. Hal ini dilihat sebagai satu fenomena yang tidak sihat dalam masyarakat seperti negara kita yang penduduknya terdiri daripada kepelbagaian kaum, agama dan keturunan.

Usaha perlu diambil dengan segera untuk membendung polarisasi kaum kerana kita tidak mahu melihat masyarakat kita menjadi masyarakat yang berpecah belah mengikut agama, keturunan, bahasa dan budaya.

Pelbagai program dan aktiviti baru dirangka sebagai pendekatan baru untuk melaksanakan program *outreach* secara lebih berkesan dan bersistematik dengan

penglibatan penduduk setempat untuk membendung penularan kes penghinaan agama dan isu perkauman.

Pendekatan damping dan didik dengan izin *engage and educate* merupakan mekanisme yang akan diketengahkan dalam mendepani cabaran mendatang bertujuan untuk menyatupadukan rakyat lagi. Antara program-program untuk menangani jurang polarisasi kaum adalah seperti berikut:

- a) Penubuhan **Majlis Konsultasi Perpaduan Negara** pada 11 September 2013 yang bertujuan untuk mengenalpasti isu-isu dan mencadangkan usaha-usaha ke arah perpaduan nasional dan kesepaduan rakyat Malaysia agar keharmonian terus terpelihara.
- b) Meningkatkan persefahaman di kalangan penganut agama melalui **Jawatankuasa Mempromosikan Persefahaman Dan Keharmonian Di Antara Penganut Agama (JKMPKA)** yang terdiri daripada wakil pemimpin Islam dan bukan Islam seperti Hindu, Buddha, Kristian, Sikh, Tao dan Baha'i dengan mengadakan dialog-dialog keagamaan di kalangan penganut-penganut agama.
- c) Penubuhan **Program Skwad Unity** yang telah dilancarkan oleh Yang Amat Berhormat Perdana Menteri pada 9 Mac tahun 2014. Skwad Uniti akan menjadi perantaraan antara agensi-agensi kerajaan dengan masyarakat yang berperanan untuk mengukuhkan semangat perpaduan di kalangan masyarakat sejajar dengan penyatuan nasional.
- d) Manakala dalam usaha memantapkan perpaduan di peringkat akar umbi, **Program Sayangi Komuniti** diperkenalkan. Program ini memberi penekanan kepada keselamatan, kebersihan, keselesaan, pendidikan, kesejahteraan dan semangat perpaduan di kawasan kediaman dan di peringkat akar umbi.

- e) Manakala untuk menggalakkan penyertaan belia, lebih banyak program **wacana, perbincangan meja bulat, seminar dan forum** bagi percambahan idea untuk meningkatkan kefahaman mengenai Kontrak Sosial dan Perlembagaan Persekutuan.
- f) Menyebarluaskan pendidikan perdamaian di kalangan komuniti agar melakukan pencelahan atau intervensi konflik atau perselisihan antara dua pihak di dalam masyarakat. Untuk mencapai objektif ini, JPNIN melatih **pasukan mediator komuniti** sebagai kumpulan yang dirujuk oleh masyarakat.
- g) Penghayatan kepada Rukun Negara sebagai asas perpaduan nasional. Oleh yang demikian, program **MyRukun Negara** diperkenalkan di 1,781 Tabika Perpaduan dan 6,068 **Kelab Rukun Negara** di peringkat sekolah rendah, di peringkat menengah serta 140 **Sekretariat Rukun Negara** di peringkat IPTA dan IPTS juga.

Antara program inovasi baru yang diperkenalkan sebagai *The Way Forward* ialah:

- a) **Program latihan industri perpaduan atau *Unity Internship Programme*.**
Program ini bertujuan untuk menangkis persepsi bahawa syarikat-syarikat bukan bumiputera hanya mengambil pekerja yang terdiri daripada kelompok kaum tertentu sahaja. Objektif kedua program latihan industri perpaduan dijalankan sebagai kaedah menggalakkan silang kerjaya untuk pengukuhan perpaduan dan penggalakan silang budaya atau dengan izin, *cross-cultural*, pemahaman antara agama, *inter-faith* dan penerimaan antara kaum atau *inter-race*.
- b) **JPNIN juga memantapkan perpaduan melalui program informasi yang disampaikan melalui slot program tema dan mesej perpaduan iaitu, "*Membudayakan Perpaduan, Meraikan Kepelbagaian*".**

- c) Program Rakan Perpaduan atau *partners in unity* diperkenalkan juga untuk mengukuhkan jaringan sosial dengan pertubuhan persatuan sukarela dan badan bukan kerajaan.

Adalah dipercayai bahawa melalui langkah-langkah, kepekaan dan kerjasama semua rakyat jelata, keharmonian dan perpaduan akan dapat terus dipupuk, keamanan dan kebahagiaan dikekalkan untuk manfaat semua rakyat dan generasi yang akan datang, selaras dengan hasrat Wawasan Negara dan Gagasan 1 Malaysia.